



PRESIDENT: Rev Sharon Hollis

GENERAL SECRETARY: Colleen Geyer

Lotu ma'a Tonga

Kuo fai ha fakalotolahi ki he kakai 'e he Palesiteni 'o e Siasi Fakatahataha 'o 'Aositelēlia', Faifekau Sharon Hollis pea mo e Sea 'o e Konifelenisi Fakafonua 'a Tonga he Siasi Fakatahataha' (TNC), Faifekau Feke Kamitoni, ke nau lotu ma'a Tonga, hili ko ia e hake mai 'a e peau kula' 'i he po'uli hifo 'o e pō Tokonaki'.

Kuo motuhia e ngaahi laine fetu'utaki' talu e hake mai 'a e peau kula', tupu mei he puna ko ia 'a e mo'ungaafi lolofonua 'i Hunga Tonga Hunga Ha'apai'. Ko e kāinga Tonga 'i 'Aositelēlia mo e tapa kehekehe 'o māmani' kuo nau fakahoko e ngaahi lotu hūfia hokohoko he 'aho kotoa, lolotonga 'enau tatali ki ha ngaahi ongoongo mei honau fāmili 'i Tonga'.

Ko e konga lahi 'o Tonga 'oku kei faliki 'aki e efu' pea ko e kakai' 'oku 'ikai ha 'uhila talu e hake mai 'a e peau kula'. Ne toe uesia foki 'a Fisi mo e ngaahi fonua kehe he Pasifiki' 'a ia 'oku te'eki mahino mai e ngātanga e maumau kuo hoko'.

“Oku ou 'oatu e fakalolahi ki he kau mēmipa kotoa 'o e Siasi Fakatahataha' ke mou kau mai he lotu ma'ae kakai 'o Tonga pea mo e Pasifiki' kuo uesia 'e he peau kula'”, ko Faifekau Hollis ia. “Oku tau lotua ke malu e kakai' mo kinautolu kuo mole pe maumau honau ngaahi 'api' pea mo kinautolu kotoa 'oku loto hoha'a he tatali ki ha ongoongo mei honau ngaahi fāmili'.”

“Oku ou toe 'oatu mo e fakalotolahi ki he kakai 'o e Siasi Fakatahataha' ke mou fetu'utaki mo e kakai 'oku mou 'ilo he kāinga Tonga 'Aositelēlia' mo 'oatu ha poupou 'i he taimi faingata'a ko eni lolotonga 'enau tatali ki ha ongoongo mei honau ngaahi fāmili' mo e maheni'.

Ne pehē 'e Faifekau Feke Kamitoni, ko e 'ikai malava ko ia ke fai ha fetu'utaki mo e fāmili' ke vakai'i pe 'oku nau malu', kuo fakatupu puputu'u mo loto tailiili ia ki he kāinga Tonga 'i 'Aositelēlia'.

“Ko 'emau hoha'a lahi taha' ki he 'ikai 'ilo pe ko e hā e me'a kuo hoko ki homau ngaahi fāmili 'i Tonga'”, ko Faifekau Kamitoni ia.

“Ko e tokolahi 'i homau kāinga' 'oku nau fetu'utaki mo e fāmili 'i Tonga' he uike kotoa. Ka ko e vakai' atu ki he laku 'a e mo'ungaafi' mo e hake 'a e peau kula' 'i he ongoongo', pea fakafokifā kuo motuhia mei he taha kotoa, 'oku fakatupu manavahē 'aupito ia”.

Talu e hake 'a e peau kula', mo e tu'u fepoupou'aki 'a e kāinga Tonga 'i 'Aositelēlia'. Ne fakahoko ha lotu sēini fungaope 'e he Kautaha Pasifika TV mo e Letioo'. Ne kau atu ki ai e kāinga Tonga mei he Siasi Fakatahataha' 'o kau ai e Sea mālōlō 'o e Konifelenisi Fakafonua 'a Tonga', Faifekau Jason Kioa.

Ko e ngaahi kainga' 'i honau feitu'u' 'i he fonua' ni 'oku nau fakataha, 'i he taimi lahi ko e fakataha fungaope, 'o fakatahataha' i e kakai' ke fepoupouaki mo lotua e ngaahi fāmili pea mo e kakai 'o Tonga'.



PRESIDENT: Rev Sharon Hollis

GENERAL SECRETARY: Colleen Geyer

“Kuo hoko e ngaahi Siasi’ ko e feitu’u ‘o e fetu’utaki mo e fetu’utaki’anga ma’ae kāinga Tonga’ lolotonga e taimi fakalilifu ko eni’. Neongo ‘oku ‘ikai lava ha talanoa mo homau ngaahi fāmili’ mo e maheni’, ‘oku mau lotu ta’etuku ma’anautolu,” ko Faifekau Kamitoni ia. Ne ne toe pehē foki, ko e ko e tokolahi ‘o e kau toulekeleka ‘i he kāinga’, ‘oku nau hoha’a ki honau fāmili’ mo e kāinga’, pea ne tokolahi mo e kau ngāue fakafa’ahita’u lolotonga nofo ‘Aositelēlia ne nau lotomo’ua ki he’enua fānau’ mo e fāmili’.

“‘Oku ou fakafongā’i atu e Konifelenisi Fakafonua ‘a Tonga’ pea mo e kāinga Tonga kotoa ‘i ‘Aositelēlia’ ni, ‘a ‘emau loto hounga ‘i he ngaahi fakakaukau mo e lotu kuo foaki ma’a Tonga mo homau kakai’.”

Ne fakamālō ‘a Palesiteni Faifekau Hollis ki he Pule’anga ‘Aositelēlia’, ‘a ia ne kau fakataha mo ‘Aotealoha/Nu’u Sila, ‘i hono fakafolau atu e vakapuna savea ke fakafuofua e maumau ‘i Tonga’, pea ‘oku’ ne tapou ke nau ngāue mo e ngaahi Pule’anga kehe’ ke ‘ave e ngaahi tokoni ‘ofa ‘oku fiema’u taimi nounou ki he lolotonga’ ni mo e fiema’u ‘e fai ‘o fuoloa ki he kaha’u’.

“‘Oku mau ‘ilo ‘e ‘i ai e fiema’u vivili ange ki ha tokoni ‘ofa ki Tonga pea mo e Pasifiki’, pea faingata’a ange ‘i he ngaahi pole ‘o ha hake tu’o tolu mai ‘a e Kōviti’. ‘Oku mau ‘oatu e fakalotolahi ki he Pule’anga ‘Aositelēlia’, ke fai kotoa e me’a ‘oku’ ne malava’, ke tokoni ki he ngaahi feinga fakaakeake ‘oku fai he lolotonga’ ni pea mo e ngaahi māhina ‘oku hanga mei mu’a’.”

Ko e Va’a “UnitingWorld” ‘oku mau ke poupu’i hotau ngaahi hoa ngāue Tonga’, ‘i ha mahino mai hono fakafuofua e ngaahi fiema’u’.